



册府元龜  
卷之四百四十二  
至四十四



13  
849  
145



明 4 3  
849  
145



冊府元龜

淮南李嗣京叅閱

西極文翔鳳訂正

豫章黃國琦較釋

將帥部

一百三

敗衄第二

晉成都王穎表陸機爲平原內史惠帝太安中穎假  
機後將軍河北大都督討長沙王又列軍自朝歌至  
於河橋鼓聲聞數百里漢魏以來出師之盛未嘗有  
也又與機戰于鹿苑機軍大敗赴十里澗而死者如

積焉水爲之不流將軍賈稜皆死之

新蔡王騰爲車騎將軍鎮鄴時公師藩與平陽人汲桑等爲羣盜起於清河郟縣衆千餘人寇頓丘以莖成都王穎爲辭載穎主而行與張泓故將李豐等將攻鄴騰曰孤在并州七年胡圍城不能尅汲桑小賊何足憂也及豐等至騰不能守率輕騎而走爲豐所害四子虞矯紹確虞有勇力騰之被害虞逐豐豐投水而死是日虞及矯紹并鉅鹿太守崔曼車騎長史羊桓從事中郎蔡克等又爲豐餘黨所害及諸名家流移依鄴者死亡竝盡

劉琨爲并州都督屬石勒攻樂平太守韓據請救於琨而琨自以士衆新合欲因其銳以威勒箕澹諫曰此雖晉人久在荒裔未習息信難以法御今內收鮮卑之餘穀外抄殘故之牛羊且閉關守險務農息士旣服化感義然後用之則功可立也琨不從悉發其衆命澹領步騎二萬爲前驅琨自爲後繼勒先據險要設伏以擊澹大破之一軍皆沒

王堪爲車騎將軍懷帝永嘉三年三月劉元海寇黎陽遣堪攀之王師敗績于延津死者三萬餘人九月堪與平北將軍曹武討劉聰王師敗績堪奔還京師

山簡爲征南將軍永嘉四年九月雍州人王如舉兵反於宛殺害令長自號大將軍司雍二州牧大掠漢沔新平人龐寔馮翊人嚴寔京兆人侯曉等各起兵應之簡及荊州刺史王澄南中郎將杜蕤并遣兵援京師及如戰於宛諸軍皆大敗王澄獨以衆進至汴口衆潰而歸

李矩爲冠軍將軍時劉聰使劉曜陷長安愍帝出降趙固郭默攻河東至於絳邑右司隸部人盜牧馬負妻子奔之者三萬餘騎騎兵將軍劉勳追討之殺萬餘人固默引歸劉頡遮邀擊之爲固所敗聰使子粲及劉雅等伐趙固次于小平津固揚言曰要當生縛劉粲以贖天子聰聞而惡之李矩使郭默郭誦救趙固屯于維汭遣耿雅張皮潛濟襲粲貝丘王翼光自厘城覘之以告粲粲曰征東南渡趙固望聲逃竄彼方憂自固何暇來邪且聞上身在此自當不敢北視况敢濟乎不須驚動將士也是夜雅等襲敗粲軍粲奔據陽鄉雅館穀粲壘雅聞而馳還柵于壘外與雅相持聰聞粲敗使太尉范隆率騎赴之雅等懼率衆五千突圍趨北山而南劉勳追之戰于河陽雅師大敗死者三千五百人投河死者千餘人

梁巨爲冠軍將軍劉聰攻河內石勒率騎會之攻巨於武德懷帝遣兵救之勒留諸將守武德與王桑逆巨於長陵巨請降勒弗許巨踰城而遁軍人執之勒馳如武德坑降卒萬餘數巨罪而害之王師退還河北諸堡壁大震皆請降送任于勒

荀羨爲建威將軍攻慕容雋山莊

土留切

拔之斬雋太

山太守賈堅雋青州刺史慕容塵遣司馬悅明救之羨師敗績復陷山莊諸葛攸又率水陸二萬討雋入自石門屯于河渚攸部將匡超進據嶠嶰蕭館屯于新柵又遣督護徐罔率水軍三千泛舟上下爲東西

聲勢雋遣慕容評傅顏等統步騎五萬戰于東阿王師敗績

毛寶爲征虜將軍庾亮謀北伐上疏解豫州請以授寶于是明帝詔以寶監楊州之江西諸軍事豫州刺史將軍如故與西陽太守樊峻以萬人守邾城石季龍惡之乃遣其子鑒與其將夔安李菟等五萬人來寇張格渡二萬騎攻邾城寶求救於亮亮以城固不時遣軍城遂陷寶峻等率左右突圍出赴江死者六千人寶亦溺死

徐龕爲征討大將軍褚裒督護裒遣龕伐沛獲僞相

友重郡中二千餘人歸降魯郡山有五百餘家亦建  
義請還遣龔領銳兵三千迎之龔違哀節度軍次  
代渡爲石遵將李苑所敗死傷大半龔執節不撓爲  
賊所害

尹奉爲寧州刺史李雄據益州寧州李才麗遺起義  
兵攻雄將任佗李謙等雄遣其將羅掌費黑救之奉  
遣裨將姚昂朱提太守楊術援遺戰于登臺昂等敗  
績術死之

李釗爲越雋太守時王遜爲寧州刺史先是釗爲李  
雄所執自蜀逃歸遜復以釗爲越雋太守李雄遣李  
讓任佗攻釗釗自南秦與漢嘉太守王載共拒之戰  
于溫水釗敗績載遂以二郡附雄

桓宣爲平北將軍都督司雍梁三州南陽襄陽新野  
南鄉四郡軍事梁州刺史庾翼遷鎮襄陽令宣進伐  
石季龍將李羆軍次丹水爲賊所敗翼怒貶宣爲建  
威將軍

謝尚爲西中郎將督揚州之六郡諸軍豫州刺史假  
節鎮歷陽大司馬桓溫欲有事中原使尚率衆向壽  
春進號安西將軍初苻健將張遇降尚尚不能緩懷  
之遇怒據許昌叛尚討之爲遇所敗收付廷尉時康

獻皇后臨朝卽尚之甥也特令降號爲建威將軍  
桓温爲大司馬率衆五萬伐慕容暉前兗州刺史孫  
元起兵應之温部將檀玄攻胡陸執暉寧東慕容忠  
暉遣其將慕容厲與温戰于黃墟厲師大敗單馬奔  
還高平太守徐翻以郡歸順温前鋒朱序又破暉將  
傅顔于林渚温軍大振次于枋頭暉懼謀奔和龍慕  
容垂曰不然臣請擊之若戰不捷走未晚也乃以垂  
爲使持節南討大都督慕容德爲征南將軍率衆五  
萬拒温使其散騎侍郎樂嵩乞師於苻堅堅遣將軍  
苟池率衆二萬出自雒陽師于潁川外爲赴援內實

觀隙有蕪弁之志矣慕容德屯于石門絕温糧漕豫  
州刺史李邦率州兵五千斷温饋運温頻戰不利糧  
運復絕及聞堅師之至乃焚舟棄甲而退德率勁騎  
四千先温至襄邑東伏於澗中與垂前後夾擊王師  
大敗死者三萬餘人苟池聞温班師邀擊于譙温衆  
又敗死者萬計

桓豁遷征西大將軍開府及苻堅陷仇池豁以新野  
太守吉挹行魏興太守督護梁州五郡軍事戍梁州  
堅陷涪城梁州刺史楊亮益州刺史周仲孫並委戍  
奔潰以威略不振所在覆敗又上疏陳謝固辭不拜

開府

郗恢為秦州刺史督隴上軍時魏氏強盛山陵危逼  
恢遣江夏相鄧啓方等以萬人拒之與魏道武戰于  
滎陽大敗而還

劉牢之為龍驤將軍時苻堅伐晉敗歸長安牢之屯  
郵城討諸未服河南城堡承風歸順者甚衆時堅子  
丕據鄴為慕容垂所逼請降牢之引兵救之垂聞軍  
至出新興城北走牢之與沛郡太守田次之追之行  
二百里至五橋澤中爭趣輜重稍亂為垂所擊牢之  
敗績士卒殲焉牢之策馬跳五丈澗得脫會丕救至

因入臨漳集亡散兵復少振牢之以軍敗徵還

劉毅為冠軍將軍毅躡桓玄死桓振桓謙復聚衆拒  
毅於靈溪玄將馮該以兵會於振毅進擊為振所敗  
退次潯陽坐免官尋原之又盧循反於廣州以舟師  
二萬發姑孰徐道覆聞毅將至建鄴報盧循曰劉毅  
兵重成敗繫此一戰宜併力拒之循乃引兵發巴陵  
與道覆連旗而下毅次于桑落州與賊戰敗績棄船  
以數百人步走餘衆皆為賊所虜輜重盈積皆棄之  
毅走經涉蠻晉飢困死亡至者十二三叅軍羊邃竭  
力營護之僅而獲免焉



魯宗之爲南陽太守時桓振旣破江陵自爲荊州刺史都督八州宗之自襄陽破振將溫楷于柞溪進屯紀南振聞楷敗留其將馮該守營自率衆與宗之大戰振勇冠三軍衆莫能禦宗之敗績

宋桂陽王義真鎮關中正脩旣死人情離異無相統一高祖遣將軍朱齡石替義真鎮關中使義真輕兵疾歸諸將競斂財貨多載子女方軌徐行虜追騎且至建威將軍傅弘之曰公處分亟進恐虜追擊人也今多將輜重一日行不過十里虜騎追至何以待之宜棄車輕行乃可以免不從賊追兵果至騎數萬匹

輔國將軍蒯恩斷後不能禁至青泥後軍大敗諸將及府功曹王賜悉被俘虜義真在前故得與數百人奔散日暮虜不復窮追義真與左右相失獨逃草中中兵參軍段宏單騎追尋綠道叫義真識其聲出就之曰君非段中兵邪身在此宏大喜負之而歸義真謂宏曰今日之事誠無崖略然丈夫不經此何以知艱難初高祖聞青泥敗未得義真審問有前至者勸之並云闇夜奔敗無以知存亡高祖怒甚剋日北伐謝晦諫不從及得宏啟事知義真已免乃止

劉粹爲征虜將軍文帝元嘉三年討謝晦遣粹弟車

騎從事郎中道濟龍驤將軍沈敞之就粹自六道向江陵粹以道濟行竟陵內史與敞之及南陽太守沈道興步騎至沙橋為晦司馬周超所敗士衆傷死者過半降號寧朔將軍

臧質為輔國將軍時後魏太武侵徐豫率大衆數十萬遂向彭城以質為輔國將軍假節直佐率萬人北救始至盱眙大武已過淮穴從僕射胡崇之領質府司馬崇之副臧澄之為太子左積弩將軍及毛熙祚亦受統於質盱眙城東有高山質慮魏據之使崇之澄之二軍營於山上質營城南魏軍攻崇之澄之二

營崇之等力戰不敵衆散竝為後魏所殺又攻熙祚熙祚所領悉北府精兵幢主李灌率厲將士殺賊甚多隊主周裔之外監楊方生又率射賊賊垂退會熙祚被創死軍遂散亂其日質案兵不敢救故三營一時覆沒初仇池之平也以崇之為龍驤將軍北秦州刺史宋百頂行至濁水為索虜所攻舉軍敗散崇之及將佐以下皆為後魏所執後得叛還至是又為後魏所敗焉熙祚司州刺史兄子也崇之熙祚並贈正員郎澄之三營既敗其夕質軍亦奔散棄輜重器甲單七百人投盱眙

張永以元嘉二十九年太祖令督冀州青州之濟南樂安太守三郡諸軍事揚威將軍冀州刺史督王玄謨申坦等諸將經略河南攻碭礮城累旬不能拔其年八月七日夜虜開門燒樓及攻車士卒燒死及爲虜所殺甚衆永卽夜撤圍退軍不報告諸將衆軍驚擾爲虜所乘死敗塗地永及申坦並爲統府撫軍將軍蕭思話所收繫於歷城獄太祖以屢征無功諸將不可任責永等與思話詔曰虜旣乘利方向盛冬若脫敢送死兄弟父子自共當之言及增憤可以示張永申坦又與江夏王義恭書曰早知諸將如此恨不

以白刃驅之今者悔何所及後永爲使持節都督南兗徐二州諸軍事南兗州刺史寧侍將軍如故時薛安都據彭城請降而誠心不款明帝遣永與沈攸之以重兵迎之加督前鋒諸軍事進軍彭城安都招引索虜之兵旣至士卒離散永狼狽引軍還爲虜所追大敗復值寒雪士卒離散永脚指斷落僅以身免失其第四子

王玄謨元嘉中守碭礮江夏王義恭爲征討都督以爲碭礮不可守召令還爲魏軍所追大破之流矢中臂還至歷城義恭與玄謨書曰聞因敗爲成臂上金

瘡得非金印之徵邪

田益之者弋陽西山蠻也晉安王子勛反遣其將郭確守弋陽益之起義攻郭確於弋陽以益之爲輔國將軍督弋陽西山事輔國將軍劉劭赴壽陽築長圍始合田益之率蠻宗萬餘人攻子勛將龐定光於義陽定光遣從兄文生拒之爲益之所破見殺遂圍其城定光求救於子勛子勛以定光父孟虬爲司州刺史率精兵五千救義陽并解壽陽之圍崑珍奇文自懸瓠率三千人援定光屯軍了水益之不戰望風奔散孟虬乘勝進軍向壽陽

王蘊後廢帝元徽初爲東陽太守未之郡值桂陽王休範逼京邑蘊領兵朱雀門戰敗被創事平除侍中南齊李安人初仕宋爲寧朔將軍隨吳喜沈攸之擊虜達唯口戰敗還保宿豫淮北旣沒明帝勅留安人戍角城

陳顯達督平北將軍崔惠景衆軍四萬圍南鄉界馬圈城去襄陽三百里攻之四十日虜食盡噉死人肉及樹皮外圍旣急虜突走斬獲千計官軍競取城中緇不復窮追顯達入據其城遣軍主莊丘黑進取南鄉縣故從陽郡治也後魏孝文自領十餘萬騎奄至

顯達引軍渡水西據鷹子山築城人情沮敗虜兵甚急軍主崔恭祖胡松以烏布幔盛顯達數人擔之逕道從分磧山出均水口臺軍緣道奔退死者三萬人左軍將軍張千戰死追贈遊擊將軍顯達素有威聲著於蠻虜至是大損喪焉

裴叔業明帝時為輔國將軍領眾圍渦陽後魏廣陵王率眾拒戰叔業等大敗之斬獲甚眾魏主聞廣陵王敗遣偽都督王肅大將軍楊大眼步騎十餘萬救渦陽叔業見兵盛夜委軍遁走明日官軍奔潰虜追之傷殺不可勝數日暮乃止叔業還保渦口

胡諧之為衛尉永明八年率禁兵討巴策王子響於淝陵兼長史行事臺軍為子響所敗有司奏免官權行軍如故

王珍國為征虜將軍時梁高祖兵至東昏石頭軍主朱僧勇率水軍二千人歸降東昏又遣征虜將軍王珍國帥軍主胡獸牙列陳於航南大路悉配精手利器尚十餘萬人闔人王張子持白獸幡督帥諸軍又開航背水以絕歸路王茂曹景等犄角奔之將士皆殊死戰無不一當百鼓噪震天地珍國之眾一時瓦解投淮死者積尸與航等後至者乘之以濟於是朱

爵諸軍望之皆潰散義兵追至宣陽門李居士以新  
亭壘徐元瑜以東府城降石頭白下諸軍並宵潰  
梁馬仙琕遷司州諸軍事司州刺史魏豫州人白早  
生殺其刺史琅邪王司馬慶曾自號平北將軍推鄉  
人胡游爲刺史以懸瓠來降高祖使仙琕赴之遣直  
閣將軍武會超馬廣率衆爲援仙琕進頓楚王城遣  
副將齊荀兒以兵二千助守懸瓠魏中山王英率衆  
十萬攻懸瓠仙琕遣廣會超等三關英破懸瓠執齊  
荀兒遂進攻馬廣又破廣生擒之送雒陽仙琕不能  
救會超亦相次退散魏軍遂進據三關仙琕坐徵還

南康簡王績之子會理爲平北將軍武帝太清元年  
督衆軍北討至彭城爲魏師所敗退歸本鎮  
邵陵雋王綸太清二年進位中衛將軍侯景構逆加  
征討大都督率衆討景將發高祖誡曰侯景小豎頗  
習行陣未可以一戰卽殄當以歲月圖之綸次鍾離  
景已渡采石綸乃晝夜兼道旋軍入赴濟江中流風  
起人馬溺者十二三遂率寧遠將軍西豐公大春新  
塗公大成等步騎三萬發自京口將軍趙伯超曰若  
從黃城大道必與賊遇不如徑路直指鍾山出其不  
意綸從之衆軍掩至賊徒大駭分爲三道攻綸與戰

大破之斬首千餘級翌日賊又來攻相持日晚賊稍引却南安侯駿以數十騎馳之賊迴距駿部亂賊因逼大軍遂潰綸至鍾山衆裁千人賊圍之戰又敗乃奔還京口三年春綸復與東陽州刺史大連等入援至于驃騎洲進位司空臺城陷綸奔禹穴

羊鴉仁前爲司馬刺史太清三年三月鴉仁等率所部入援臺城進軍東府北與賊戰大敗

王質爲假節寧遠將軍領東宮兵從貞陽侯北伐及貞陽敗績脫身逃還侯景於壽陽構逆質又領舟師隨衆軍拒之景軍濟江質便退走尋領步騎頓于宣

陽門外景軍至京師質不戰而潰乃翦髮爲桑門落匿人間及柳仲禮等會援京邑軍據南崗質又收合餘衆從之京城陷西奔荊州

蕭明武帝兄子封汝陽侯豫州刺史武帝旣納侯景詔明率水陸諸軍趨彭城大圖進取又命兗州刺史南康嗣王會理總馭羣帥指授方畧明渡淮未幾官軍破擒之盡俘其衆魏帝升門樓觀引見明及諸將帥釋其禁送于晉陽

楊乾運爲信威將軍又達奚武圍南鄭武陵王紀遣乾運率兵援之爲武所敗

陳侯安都高祖時為鎮北將軍率眾與周文育西討  
 王琳至武昌琳將樊猛棄城走文育亦自豫章至時  
 兩將俱行不相統攝因部下交爭稍不平軍至郢州  
 琳將潘純於城中遙射官軍安都怒進軍圍之未能  
 尅而王琳至于菴口安都乃釋郢州悉眾往沌口以  
 禦之遇風不得進琳據東岸官軍據西岸相持數日  
 乃合戰安都等敗績與周文育徐敬成並為琳所囚  
 總以一長鎖繫之置于牖音下音令所親宦者王子晉  
 掌視之琳下至湓城白水浦安都等耳言許厚賂子  
 魯子晉乃僞以小船依牖而釣夜載安都文育敬成

上岸入深草中步投官軍還都自劾詔赦之復其

官爵

程靈洗為蘭陵太守隨周文育西討王琳於沌口敗  
 績為琳所拘明年與侯安都等逃歸

吳明徹授都督南北交青譙五州諸軍事南兖州刺  
 史會周氏滅齊高祖將事徐兗詔明徹進軍北伐令  
 世子戎昭將軍貞外散騎侍郎慧覺攝行州事明徹  
 軍至呂梁周徐州總管梁士彥率眾拒戰明徹頻破  
 之因退兵守城不復敢出明徹仍引清水以灌其城  
 環列舟艦於城下攻之甚急周遣上大將軍王軌將



兵救之軌輕行自清水淮口橫流豎木以鐵貫直輪  
遏斷船路諸將聞之甚恐議欲破堰拔軍以舫載馬  
馬明成裴子烈議曰若決堰下船船必傾倒豈可得  
乎不如前遣馬出於事爲允適會明徹苦背疾甚篤  
知事不濟遂從之乃遣蕭摩訶帥馬軍數千前還明  
徹仍自決其堰音謳乘水勢而退軍莫其獲濟及至清  
口水勢漸微舟艦竝不得渡衆軍皆潰明徹窮促乃  
就執尋以憂憤遘疾卒於長安

蕭摩訶爲侍中驃騎大將軍會隋總管賀若弼鎮廣  
陵窺覲江左後主委摩訶備禦之任授徐州刺史禎  
明三年正月元會徵摩訶還朝賀若弼乘虛濟江襲  
京口摩訶請率兵逆戰後主不許及弼進軍鍾山摩  
訶又請曰賀若弼懸軍深入聲援猶遠且其壘壑未  
堅羣情惶懼出兵掩襲必大尅之後主謂摩訶曰公  
可爲我一決摩訶曰從來行陣爲國爲身今日之事  
兼爲妻子後主多出金帛頒賞諸軍令中鎮軍魯廣  
達陳兵白土岡居衆軍之南偏鎮東大將軍任忠次  
之護軍將軍樊毅都官尚書孔範次之摩訶軍最居  
北衆軍南北亘三十里首尾進退各不相知賀若弼  
初謂未戰將輕騎登山觀望形勢及見衆軍因馳下

置陣廣達首率所部進薄弼軍屢却俄而復振更分軍趣北援諸將孔範出戰兵交而走諸將支離陣若未合騎卒潰散駐之弗止摩訶無所用力焉為隋軍所執

南康嗣王方泰後主禎明初為侍中三年隋師濟江方泰與忠武將軍南豫州刺史樊猛左衛將軍蔣元遜領水軍於白下往來斷遏江路隋遣行軍元帥長史高穎領船艦沂流當之猛及元遜並降方泰所部將士離散乃棄船走及臺城陷與後主俱入關

呂肅為南康太守時隋來伐陳肅將兵據巫峽以五條鐵鎖橫江肅竭其私財以充軍用隋將楊素奮兵擊之四十餘戰爭馬鞞及磨刀澗守險隋軍死者五千餘人陳人盡取其鼻以求功賞既而隋軍屢撓獲陳之士三縱之肅乃遁保延州別帥廖西寵領大舫請降欲燒隋艦更決死一戰於是有五黃龍備衆色各長十餘丈驤首連接順流而東風浪大起雲霧晦冥陳人震駭不覺火自焚隋軍乘高艦張大弩以射之陳軍大敗風浪應時頓息肅收餘衆東走後魏宿沓于為虎威將軍道武天興五年正月慕容熙遣將寇遼西于等拒戰不利棄令支而還

刁雍爲建義將軍明元泰嘗七年三月雍從弟彌時亦率衆入京口親共討宋高祖宋高祖遣兵破之六月雍又侵宋青州雍敗乃收散卒保於馬耳山又爲宋州軍所逼遂入大鄉山

奚斤爲司空征赫連昌昌弟助興先守長安聞昌敗遂走入上邽斤追之不及而還詔斤班師斤上疏曰赫連昌亡保上邽鳩合餘燼未有盤據之資今因其危滅之爲易請益鎧馬平昌而還太武曰昌亡國叛夫擊之勞傷將士且可息兵取之不晚斤抗表固執乃許之給斤萬人遣將軍劉枝送馬二千匹與斤

進討安定昌退保平涼斤屯軍安定以糧竭馬死遂深壘自固監軍侍御史安頡擊昌擒之昌衆復立昌弟定爲主守平涼斤自以元帥而擒昌之功不在已深耻之乃捨輜重輕齋三日糧追定於平涼宗正娥清欲尋水而任斤不從自北道邀其走路定衆將出會一小將有罪亡入賊具告其實定知斤軍無糧乏水乃邀斤前後斤衆大潰斤及娥清劉拔爲定所擒士卒死者六七千人後太武克平涼斤與娥清等得歸免爲宰人使負酒食從駕還京師以辱之丘堆爲太僕大武世征赫連昌堆與嘗山王素督步

兵三萬人為後軍昌戰敗南奔大武遣堆與宗正娥清率五千騎略地關右昌貳城守將堅守不下堆與清攻拔之詔堆班師而宜城王奚斤表留堆等進平昌許之堆斤合軍與昌相拒擊士馬乏糧堆與義兵將軍封禮督租於民間士卒暴掠為昌所襲敗績堆將數百騎還城本紀神麌元年司空奚斤討赫連定於平涼馬髦嶺為定所擒丘堆先守韜重在安定聞斤敗棄甲東走長安帝聞大怒詔安頡斬堆盧淵為儀曹尚書孝文時南齊雍州刺史曹虎遣吏請降孝文以淵為使持節督前鋒諸軍逕赴樊鄧淵至具知曹虎譎詐之間兼陳利害詔淵進取南陽淵

以兵少糧乏表求先攻赭陽以近齊倉故也孝文許焉乃進攻赭陽齊將坦歷生來救淵素無將略為賊所敗坐免官爵為民李佐為安南將軍副大司馬咸陽王禧為殿中將軍時孝文南討佐尋被勅與征南將軍城陽王鸞安南將軍盧淵等攻赭各不相節度諸軍皆坐甲城下欲以不戰降賊佐獨勒所部晨夜攻擊屬齊明帝遣其太子右衛率坦歷生眾來援咸以勢弱不敵規欲班師佐乃簡騎二千逆賊為賊所敗坐徙瀛州為民蕭寶夤齊明帝之子以梁武克建業殺其兄弟被害

來奔宣武除爲鎮東將軍及中山王英南伐寶夤又表求征乃授使持節鎮東將軍別將以繼英配羽林虎賁五千人與英頗破梁軍乘勝遂攻鍾離淮水汎溢寶夤與英狼狽引退士卒死沒者十四五有司奏寶夤守東橋不固軍敗蹂之處以極法詔曰寶夤因難投誠宜加矜貸可恕死免官削爵還第延昌四年遷撫軍將軍冀州刺史及大乘賊起寶夤遣軍討之頗爲賊破臺軍乃滅之後於孝昌中爲司空公出師旣久兵將疲弊是月大敗還雍州仍停長安收聚離散有司處寶夤死罪詔恕爲民

楊昱爲安東將軍蕭寶夤等敗於關中以昱兼七兵尚書持節假撫軍將軍都督防守雍州昱遇賊失利而反

盧昶爲都督時梁將馬仙琕率衆攻圍朐城戍主簿文驥嬰城固守以滎陽太守趙遐爲別將與劉思祖等救之次於鮑音麗口去城五十里夏雨頗降厲涉長驅將至朐城仙琕見遐營壘未就徑來逆戰思祖率彭滿之衆望陣奔退遐孤軍奮擊獨破仙琕斬其直閣將軍軍主李魯生仙琕走分軍於朐城之西阻水列柵以圍固城遐身自潛行觀水深淺結草爲筏啣

枚夜進破其六柵遂散固城之圍進救胸城昶率大軍繼之未幾而文驥力竭以城降賊衆軍大敗昶棄其節輕騎而走唯遐獨握節而還遐坐失利免官河間王琛孝明時爲秦州刺史時東益南秦二州氏反詔琛爲都督進討氏羗大被摧破後又爲大都督與長孫雉討鮮于脩禮於鍾山琛與雉前到呼沱雉未欲戰而琛不從行達五鹿爲脩禮邀擊琛不赴之賊總至遂大敗雉與琛竝除名

章武王融宣武初爲河南尹以聚斂削爵時汾夏山胡叛逆連結正平平陽詔復融前封征東將軍持節都督以討之融寡於經略爲胡所敗

薛蠻爲持節光祿大夫假安南將軍西道別將時莫沂念生反於秦州遣其別帥卜胡王慶雲等寇涇州孝明以蠻與伊儼生等討之進及平涼郡東與賊交戰不利蠻等退還

安樂王鑒爲秘書監孝明孝昌元年徐州刺史元法僧據城反言行臺高諒自稱宋王遣其子景仲歸於梁遣其將胡龍牙成景雋元略等率衆赴彭城詔鑒討之鑒於彭城南擊元略大破之盡俘其衆旣而不備爲法僧所敗梁武遣其豫章王綜入守彭城法僧

擁其僚屬官令兵武及郭邑士女蕭餘口南入

畢闡慰為都督安樂王鑒軍司馬元法僧友聞慰與

鑒攻之為法僧所敗奔還京師被勅遇赦免

崔延伯為征西將軍孝昌元年三月討萬侯醜奴大

敗於涇川戰歿

源子恭為大都督孝莊建義元年爾朱兆寇丹谷都

督崔伯鳳戰歿都督羊文義史五龍降兆子恭奔退

盧仝為撫軍將軍營州城民就德興反詔仝以本將

軍為幽州刺史兼尚書行臺慰勞之仝慮德興難信

勸衆而往為德興所擊大敗而還

鹿念音愈為使持節兼尚書右僕射東南道行臺至東

郡值爾朱仲遠陷西交向滑臺詔與都督賀拔勝等

拒仲遠軍敗還京

崔暹為瀛州刺史武川鎮反詔暹為都督隸大都督

李崇討之暹違崇節度為賊所敗單騎潛還

北齊慕容儼神武時為揚州行臺監蕭莊王琳軍與

陳將侯瑒侯安都戰於蕪湖敗還

竇泰從神武西討令泰自潼關入泰至小關為周文

帝所襲衆盡沒泰自殺

李希光為安南將軍西交州刺史文宣責陳武帝廢

蕭明命儀同蕭軌率希光東方老裴延起王敬寶步  
騎數萬伐之以天保七年三月渡江襲克石頭城五  
將名位相侔英起以待中爲軍司蕭軌與希光並爲  
都督軍中抗禮不相服御競說謀略動必乖張頓軍  
丹陽城下值淋雨五十餘日及戰兵器並不堪施用  
故致敗亡將帥俱死士卒得還者十二三所沒器械  
軍資不可盡計

宇文述爲扶餘道將軍煬帝征高麗述與九軍至鴨  
綠水糧盡議欲班師諸將多異同述又不測帝意會  
乙支文德來請其營述先與光祿大夫宇文仲文俱奉

密旨令誘執文德旣而緩縱文德逃歸述內不自安  
遂與諸將渡水追之時文德見述軍中多飢色欲疲  
述衆每鬪便北述一日之中七戰皆捷旣恃驟勝又  
內逼羣議於是遂進東濟陸水去平壤城三十里曰  
山爲營文德復遣使僞降詣述曰若旋師者當奉高  
元高麗之君朝行在所述見士卒疲弊不可復戰又平壤  
險固卒難致力遂因其詐而還衆半濟賊擊後軍於  
是大潰不可禁止九軍敗績一日一夜還至鴨綠水  
行四百五十里初渡遼九軍三十萬五千人及還至  
遼東城唯二千七百人帝大怒以述等屬吏至東都



除名爲民先是仲文率衆至鴨綠水述以糧盡欲還仲文議以精銳追文德可以有功述固止之仲文怒曰將軍提十萬之衆不能破小賊何顏以見帝且仲文此行也固知無功矣述因厲聲曰何以知無功仲文曰昔周亞夫之爲將也見天下軍容不變此決在一人所以功成名立今者人各有心何以赴敵初帝以仲文有計畫令諸軍諮稟節度故有此言繇是述等不得已而從之遂行東至薩水宇文述兵餒退歸師遂敗績帝以屬吏諸將皆罪於仲文帝大怒釋諸將獨繫仲文憂恚發病困篤方出之卒於家

崔弘昇爲涿郡太守遼東之役簡較左武衛大將軍事至平壤與宇文述等同敗績奔還發病而卒

王辯爲虎賁中郎將時翟讓寇徐豫辯進頻擊走之讓尋與李密屯據雒口倉辯與王世充討密咀雒水相持經年辯率諸將攻敗密因薄其營戰破外柵密諸營已有潰者乘勝將入城世充不知恐將士勞倦於是鳴角收兵翻爲密徒所乘官軍大潰不可救止魏蘭根爲河北行臺定州率募鄉曲欲防井陘時爾朱榮將侯深自范陽趨山中蘭根與戰大敗

尉破胡爲開府儀同三司後主武平四年破胡長孫

洪略等與陳將吳明徹戰於呂梁南人敗之破胡走  
以免洪略戰沒遂陷秦涇二州

後周獨孤信爲驃騎大將軍從太祖入雒陽頴豫襄  
廣陳留之地竝相繼款附東魏將侯景等率衆圍雒  
陽信據金墉城旬有餘日及太祖至瀍東景退走信  
爲右軍戰不利東魏遂有雒陽

齊王憲太祖第五子也時李徹從武帝拔晉州及帝  
班師徹與憲屯鷄棲原齊後主以大將軍至憲引兵  
西上以避其鋒遣其驍將賀蘭豹子率勁騎躡憲戰  
於晉州城北憲師敗績與楊素宇文慶等力戰憲賴

以獲全

王褒初任梁爲僕射周軍征江陵梁元帝授褒都督  
城西諸軍事褒本以文雅見知一旦委以總戎深自  
勉勵盡忠勤之節被圍之後上下猜懼元帝唯於褒  
深自委信乃命褒與朱買臣率衆出宣陽之西門與  
周師戰買臣大敗褒督進不能禁乃貶爲護軍將軍  
隋韓洪高祖時爲代州總管仁壽元年突厥達頭可  
汗犯塞洪率蔚州刺史劉隆大將軍李藥王拒之遇  
虜於恒安衆寡不敵洪四面搏戰身被重瘡將士沮  
氣虜悉衆圍之矢下如雨洪僞與虜和圍少解洪率

所領潰圍而出死者大半殺虜亦倍洪及藥王除名  
爲民陷竟坐死

馮昱開皇初爲行軍總管屯乙弗泊以備胡突厥數  
萬騎來掩之昱力戰累日衆寡不敵竟爲虜所敗亡  
失數千人殺虜亦然

薛世雄爲左衛大將軍涿郡留守未幾李密逼東都  
中原騷動煬帝詔世雄率幽薊精兵將擊之軍次河  
間營於郡城南河間諸縣竝集兵依世雄大軍爲營  
欲討竇建德建德將軍來河口自選精銳數百夜來  
襲之先犯河間兵潰奔世雄營時遇霧霧晦瞑莫相

辨識軍不得成列皆騰柵而走於是大敗世雄與左  
右數十騎遁入河間城慙恚發病歸于涿郡未幾而  
卒

段達爲左翊衛將軍煬帝幸江都官詔達與太府卿  
元文郁留守東都李密據雒口縱兵侵掠城下遣將  
龐王武牙郎將霍世舉率內兵出禦之頗有功遷左  
驍衛大將軍王充之敗也密復進據比邱來至上春  
門達與判左丞郭大懿尚書韋津出兵拒之達見賊  
盛不陣而走爲密所乘軍大潰於陣繇是賊勢日盛  
王世充爲江都守時李密攻陷興雒倉進逼東都官

軍數却光祿大夫裴仁基以武寧降于密煬帝惡之  
大發兵將討焉發中詔遣充為將軍於雒口以拒密  
前後百餘戰互有勝負充乃引軍渡雒水逼倉城李  
密與戰充敗績赴水溺死者萬餘人時天寒大雪兵  
士既渡水衣皆濡濕在道凍死者又數萬人比至河  
陽纔以千數充自繫獄請罪

册府元龜

淮南李嗣京 參閱

西極文翔鳳 訂正

豫章黃國琦 較釋

將帥部 一四

敗衄第三

唐楊恭仁任隋為河南道大使時天下大亂行至譙  
郡為朱粲所敗奔還江都  
賈軌封贊皇公高祖武德元年九月軌擊薛仁果反  
為所敗

册府元龜 將帥部 卷之四百四十三

王老德為右驍衛將軍武德二年正月老德捕山賊張子惠為賊所敗徵還

裴寂為尚書右僕射武德二年宋金剛寇并州姜寶誼李仲文相次陷沒寂自請行因授晉州道行軍總管得以便宜從事軍次介州與金剛相遇保於度索原營乏水賊斷其澗路繇是危迫欲移營就水賊囚犯之師遂大潰死散略盡寂一日一夜馳至晉州自晉以東城堡一時陷賊寂上表陳謝高祖慰謝之令鎮撫河東之地會呂崇茂以夏縣舉兵反引金剛為援率兵擊之復為所敗

永安王孝基為鴻臚卿時呂崇茂叛孝基以兵攻之于筠勸孝基急圍城外援不至自相疑阻計日可平孝基將從之獨狐懷恩陰懷反計不欲崇茂早平乃說孝基曰筠言非也崇茂據城王乏攻具若引師前進必不能尅宋金剛在近表裏相助一敗塗地悔無及矣為王計者不若頓兵營攻具待秦王破賊則崇茂自孤可為不戰以屈人者也孝基又然之於是停營造攻具會宋金剛遣其將尉遲敬德卒至孝基表裏受敵於是大敗

李世勣為右武衛大將軍武德四年十二月世勣與

劉黑闥戰於宋州我師敗績

張公瑾為并州道行軍總管武德八年公瑾與突厥

戰於太谷我師敗績鄆州都督張德致死之夔州都

督行軍長史中書侍郎溫彥博為虜所執

薛仁貴為邏娑道行軍大總管高宗咸亨元年八月

仁貴及副大總管阿史那道真郭待封等為吐蕃大

將論欽陵所襲大敗於大非川

李敬玄為中書令為洮河道行軍大總管儀鳳三年

九月與工部尚書左衛大將軍劉審禮統兵以討吐

蕃戰于青海之上王師敗績時審禮領前軍深入頓

于濠所既為賊所擊敬玄按兵不救審禮遂沒于陣

敬玄收軍却出頓于承風嶺阻溝不敢動賊屯于高

岡以壓之副將左領軍員外將軍黑齒常之夜率敢

死之士五百人進掩賊營賊遂潰亂自相蹂踐死者

三百餘人吐蕃大首領拔地沒按軍背道敬玄乃擁

其餘衆還鄆州使郎將衛山馳驛奏其覆敗之狀高

宗怒不見之調露二年七月吐蕃大將贊婆及素和

貴等率衆三萬進寇河源屯兵于大非川敬玄為河

西鎮撫大使敬玄統衆與賊戰于湟川官軍敗績

蕭嗣業為鴻臚卿調露元年突厥反叛詔嗣業領軍

蕭嗣業為鴻臚卿調露元年突厥反叛詔嗣業領軍

將軍苑大智千牛將軍季景嘉等討之嗣業等初戰  
頻捷遂不設備俄逢大雪兵寒凍列營不整賊徒乘  
夜逼之嗣業窘迫拔營而走衆遂大潰爲賊所敗死  
者不可勝數大智景嘉引步兵且行且戰奔單于都  
護府

曹懷舜爲定襄道副總管討突厥史伏念懷舜及裨  
將竇義昭王孝誠等前軍先往爲賊所紿聲言伏念  
溫傳等在黑沙北各有二十騎以下煮人肉而食之  
可單馬而擒也懷舜等乃留老弱於瓠盧泊晨炊暮  
食率輕銳倍道往襲之既至黑沙人馬疲頓竟不見

賊會延陀部落西行詣伏念遇懷舜軍乞降懷舜等  
雖不獲伏念而喜得延陀遂按兵而旋行至碧淥泊  
軍始爲營營內忽有泉水大如車輪又遇大風飄折  
懷舜寢帳衆皆惡之廻至長城之北與溫傳相遇列  
陣而戰交綏而退時裴行儉頓兵於代州之陘口縱  
反間說伏念與溫傳漸相猜貳遣別帥擊伏念敗之  
伏念既退遂與懷舜等相遇於橫水懷舜及裨將李  
文陳劉敬同竇義昭凡四軍合爲方陣且行且戰經  
一日賊因便風先擊敬同之營營中潰亂懷舜義昭  
遂棄其軍輕騎奔雲州兵士隨而大奔爲賊所乘死

若不可勝數皆南首而仆懷舜與敬同復收散卒歛財帛與伏念和殺牛而盟乃領其餘衆以歸伏念遂北遁

淳于處平為陽曲道總管則天垂拱元年四月癸未突厥寇代州處平及中郎將蒲英節率兵赴救行至忻州與賊戰大敗死者五千餘人

寶壁為右監門衛中郎將則天垂拱三年十月寶壁討突厥骨咄祿元圻寶壁見黑齒嘗之擊破突厥於黃花堆又表請窮追餘寇制嘗之與寶壁計議遙為聲援寶壁以為破賊在朝夕貪功先行又令人出

塞二十餘里覘候見元珍等部落皆不設備遂率衆掩襲之既至又先遣人報賊令其嚴備出戰時寶壁下有精兵一萬三千人遂為所敗全軍盡沒單騎遁歸論者尤之寶壁坐此伏誅

王孝傑為清邊道大總管萬歲通天元年三月孝傑及副總管婁師德與吐蕃首領論欽陵贊婆戰於素羅汗山官軍敗績孝傑免官師德貶為原州員外司馬

薛訥為并州大都督府長史兼左衛大將軍玄宗開元二年契丹奚及突厥等連和屢為邊患訥建議請



出師討之詔與左監門將軍杜賓客定州刺史崔宣道等率衆二萬人出檀州道以討契丹杜賓客及姚崇皆以爲不可訥建此議時帝方欲威服四夷特令訥同紫微黃門三品議者遂息六月師至灤河盡爲契丹所覆脫身走免歸罪於崔宣道及蕃將李思敬等八人詔皆斬之特原訥罪所有官爵並從除削王昱爲益州長史開元二十六年九月昱率兵攻吐蕃安戎城爲賊所拒官軍大敗棄甲而遁兵士死者數千人

鮮于仲通爲蜀郡長史兼御史中丞劍南節度等使天寶十載仲通討蠻於雲南瀘水爲蠻所敗死者六萬人

安祿山爲河東節度使天寶十一載祿山大舉兵討契丹領衆五萬人使人於奚及謂之曰今契丹背盟我將討之汝豈不助我乎奚及遂以驍騎二千從之祿山使前驅使人鄉導屬連雨十餘日祿山行至護真河誓衆曰兵法疾雷不及掩耳又曰先人有奪人之心今久雨復去賊尚遠若倍道趨程賊不虞我之至破賊必矣軍令嚴促遂晝夜行日三百里奄至契丹牙帳契丹大駭祿山使人持一繩盡縛契丹皆欲

生得以歸是時弓弩盡濕弛而不張大將軍何思德請見曰兵士遠來倍道疲頓用之必不可不如少憇張其勢而脅之不三日必降祿山大怒欲斬之以令三軍思德請效死於先鋒思德形貌類於祿山契丹望見攢槍突而取之須臾支解其形咸謂殺得祿山賊衆增勇奚及背祿山附契丹并力夾攻殺傷略盡祿山被矢中鞍橋簪履俱墜獨以麾下二十騎走上山未及墜坑中男慶緒麾下將孫孝哲扶出之且戰數十里會夜追騎解遂投平盧城城中驍將史定方領精騎三千出追寇契丹知有救遂解圍而去祿山

得脫時史思明亦隨祿山至護真河屬連雨十餘日祿山已戰大敗祿山匹馬脫走得免投師州手殺左賢王哥解將軍河東兵馬使魚承先將推過自解思明恐其見殺逃入山谷中二十許日收得散卒七百人祿山挺身歸平盧計無所出乘其危思明將其散卒謁見祿山祿山大喜授袂而起握思明手曰謂汝已沒矣不圖見汝吾復何憂思明退而告人曰向使早出隨哥解等已死矣方知進退存亡在其時也賊續攻圍師州守捉使劉客奴伏於莽中得免求救於祿山使思明擊之賊走

高仙芝為右羽林將軍天寶十四載十一月安祿山反於范陽驅幽并突騎十萬兵向闕以誅楊國忠為名玄宗乃命仙芝訓練四軍驍雄兼募長安武力之士共二十萬以京兆牧榮王琬為元帥東擊祿山又旋命四鎮節度御史大夫封常清先往河維扞守東都十二月常清為祿山敗于武牢丙申賊師至維分兵燒建春門門者失守賊至雒城以劍士夾道長驅至天津橋我師大潰常清以麾下十數騎脫身走入苑所過命其人斷其水而追者不及遂至陝郡而仙芝領大軍初至東方欲進師會常清軍敗又欲廣其

賊勢以雪已嘗清先為仙芝麾下士素見親信相對泣以謀班師常清遂謂仙芝曰祿山包藏禍心向十年矣一朝興幽并勁卒以亂中原將軍持烏合之衆驅市人以戰今人主尚在長安去此非遠儻小不利搖動京城將軍豈不重其一舉乎常清為將軍計不如退守潼關仙芝然其言即日班師士卒等棄甲遺弓矢於路夜走保潼關朝廷大駭辛丑詔皇太子總統六軍親征寇逆以河西隴右節度御史大夫哥舒翰為皇太子先鋒副元帥領河隴兵并仙芝舊卒二十萬鎮潼關有詔徵天下兵四面齊舉將收雒陽賊

將崔乾祐扣關請挑戰哥舒翰以四面徵舉未集而不與戰國忠素與哥舒翰不協因言逗遛不進玄宗數使催兵出關十五載六月乙酉哥舒翰領兵馬步十五萬賊將崔乾祐會戰初哥舒翰造氈車以氈蒙其車以馬駕之盡以龍虎之狀五色相宣又以金銀飾其盡獸之目及爪將衝戰焉因其驚駭擬從而犄角攢戈夾而逐之賊知其計積薪芻於隘候氈車至順風縱火焚之駕馬奔駭燒氈車及薪芻烟焰昏黑兩軍不相辯我師謂賊軍在煙焰之中遂集弓弩併力射之賊軍抽退盡日矢盡方覺無賊我師從關門

六七里路狹比拉黃河南是古岸排蹴進不得賊抽軍從南山設疑曳柴揚塵以同羅詣真習險之衆直透黃河古岸橫截我師我師敗績沉河而死十有二三哥舒翰在河北高阜上觀軍陣進退之勢于時有楸糧船在河北岸左右言取船渡兵士可得遂令將船百餘隻到河南岸度人舟中之楮可掬登船爭渡者不可勝數每滿卽沉如是登船沉者數十渡餘軍盡散走還入關先時于關門穿三道壑闊二丈深丈餘師敗之際前後奔蹙人馬相推入坑湏臾壑滿兵士踐人馬之上而得過入關辛卯潼關不守河東防

禦使呂崇賁華州防禦使魏仲犀馮瑒防禦使李彭州上雒防禦使楊黯皆棄郡走所在兵將解辯而散其日翰大將緝大福蘇法鼎管崇嗣等於靈寶西原與賊軍戰聞潼關失守亦各奔散西走入關翰戰敗垂淚入關至西驛署榜招其散卒欲收其餘燼却守潼關爲帳下士蕃將水拔歸仁領部落百騎圍驛執翰將降祿山會賊將鄧季陽田乾真各領數百騎至便領翰將歸祿山其日副將高元蕩等一十五人同被執送田本朝廷聞之大駭初翰爲隴右節度使遭風疾廢于家祿山之叛籍其威名故有是拜至軍中

不能親庶務委政於軍司馬田良丘良丘復不敢專斷教令不一頗無部伍其將王思禮李承光爭長不叶人無鬪志及戰敗爲歸仁所執將東行翰乃作突厥語問其故對曰欲將相公出關翰曰何也歸仁曰相公不見封掌清高仙芝乎掌清東京戰敗仙芝却保潼關竝斬於此相公今將國家二十萬衆一舉而喪敗我恐相公還死於此翰曰吾寧效仙芝死於此豈能偷生見祿山乎汝捨我歸仁不從執翰送祿山監察御史高適爲翰掌書記在潼關及翰敗適自駱谷南奔及河池郡遇玄宗幸蜀上疏論潼關敗亡之

事其略曰僕射哥舒翰忠義感激臣嘗知之然疾病  
沉頓智力俱竭監軍事李大宜與將士約為香火使  
娼婦彈箏篪琵琶以此為樂樽蒲飲酒不卹軍務蕃  
軍及秦隴武士盛夏五六月於赤日之中食倉米飯  
欲勇戰安可得乎故有望敵散亡臨陣翻動萬全之  
地一朝而失南陽之軍魯炤何履光趙國塚各皆持  
節監軍等數人更相用事寧有是戰而能必勝哉臣  
與國忠固爭終不見納陛下因此屢巴山劔戟之險  
西幸蜀中避其蠱毒未足為耻哥舒翰統兵討安祿  
山次于靈寶縣之西  
原八月與賊交戰官軍南迫險峭北臨黃河崔乾祐  
以數千人先據險要翰及田良丘等浮船中流以觀

進退謂乾祐兵少輕之遂促將士令進爭路擁塞無  
復隊伍午後東風急乾祐以草車數十乘縱火焚之  
煙燭亘天將士掩面開目不得因為克徒所乘王師  
自相擠墜于河其後者見前軍陷敗悉潰填委于河  
北死者數萬人號叫之聲振天地縛器械以槍為械  
投北岸十不存一二軍既敗翰與數百騎馳而西歸  
為大拔歸仁執降于賊祿山謂之曰汝嘗輕我今日  
如何翰懼俯伏稱肉眼不識陛下遂至於此陛下為  
撥亂主今天下未平李光弼在土門來填在河南魯  
炤在南陽但留臣以尺書招之不日平矣祿山大喜  
遂僞署翰司空令作書招光弼等諸將報書皆讓翰  
不死節祿山知事不諧遂閉翰於苑中潛殺之  
魯炤為南陽太守天寶十五載正月安祿山犯官闕  
詔以魯炤兼御史大夫充南陽節度使率嶺南黔中  
山南東道子弟五萬人屯葉縣北拒賊炤遂以潢水  
之南堅以自固表請薛愿為潁川長史訓兵圍守五

月丁巳炤與賊將武令珣戰于葉縣王師敗績陷南陽炤攜百姓數千人奔于順陽川

房瑄肅宗時為相至德元年十月瑄抗疏請兵一萬人自為帥以收京師詔許之以兵部尚書王思禮為副分為三軍使楊希文將南軍自宜壽入劉貴哲將中軍自武功入李光進將北軍自奉天入庚子房瑄以中軍北軍為先鋒師次便橋辛丑二軍先遇賊陣於陳濤王師敗績時瑄以車二千乘以馬步夾之為乘車之戰賊順風揚塵鼓譟牛皆振駭因縛草縱火焚之人畜大亂故敗癸卯瑄自將南軍又戰不利揚

希文劉貴哲降於賊瑄與幕府偏裨等奔赴行在肉袒請罪帝併宥之

郭英父為關西節度兵馬使至德二年三月賊寇武功東原英父與賊戰為賊所敗流矢中頤而走右廂兵馬使王難德軍於西原觀之不救棄甲而遁

郭子儀為朔方節度使至德二年五月子儀大舉進軍與賊將安守忠戰於西京城西清渠王師敗績初

子儀軍於滴音律余切水之西守忠軍於清渠之北越七

日而王師不進賊令軍中以木成桴而來逼我軍子儀使壯士持陷刀列於岸上以俟之賊有攀岸而上

者漸斬殺之賊軍小却守忠僞遁使人揚言曰賊走矣子儀喜悉師以逐之賊有驍銳九千爲長蛇陣守忠謂安太清曰吾爲蛇首子爲蛇尾遂令領四千人從延平門路入命太清四千人從金光路入以一千趣平川當官軍而橫擊賊首尾之陣翼張前後奔衝我師不虞賊之暴至遂大潰判官殿中侍御史韓液監軍使內侍孫知古皆爲賊生得軍資器械並委棄之子儀退守武功乾元二年三月壬申子儀與河東節度李光弼關內節度僕固懷恩河北節度王思禮河南節度許叔冀南陽節度魯炆江東節度李廣琛

興平節度李奐平盧節度董秦等九節度與逆賊安慶緒戰于相州城下官軍不利諸將皆解圍潰散初慶緒保相州子儀等合勢圍之引漳水灌其城三面自冬及春賊糧盡勢窮降在朝夕慶緒求救於史思明發魏州來救李光弼王思禮許叔冀魯炆遇賊先戰殺傷相半魯炆中矢子儀軍承後陣未及整忽有大風揚砂拔木軍中晝晦咫尺不相辨師人驚潰官軍大奔棄甲仗器械委積道路子儀等收兵斷河陽橋保東京上庶驚恐散投山谷留守崔圓河南尹蘇震詹事高適汝州刺史賈至百餘人南奔襄鄧迴兵



剽劫官吏不能止旬日方定乾元初子儀統朔方之師與河東節度李光弼

等九將兵十五萬進討史思明之遺寇十月渡河下衛州十一月圍安慶緒於相州時以子儀光弼皆是

元勳重將難相統屬故不立元帥但以中官魚朝恩

為觀軍容宣慰使是以衆軍進退無所承稟自冬俱

春不能立功正月始詔子儀為攻城副元帥光弼為

野戰副元帥又引漳水灌之城水深數尺會史思明

明自范陽率衆南下光弼子儀等軍逆擊於鄴南思

明敗而賊將李歸仁犯我軍亦敗思明敗而北我師

敗而南九將之兵多走本鎮山東之地盡沒于儀至東都而止

李光弼為副元帥上元元年十二月戊寅光弼等為

逆賊史思明所敗初思明潛遣間諜說官軍曰雒中

將士皆幽朔人也久戍思歸士多不睦陝州觀軍容

使內侍魚朝恩聞之以為然乃告光弼及諸節度僕

固懷恩衛伯玉等曰可速出軍盡掃殘寇光弼等然

之乃帥兩道齊進以收東京軍次北邙山光弼懷恩

列陣以待之思明至賊奪高原以長槍七百人令壯

士執刀隨其後以驅之令衝我軍交鋒而潰士卒咸

棄甲奔敗魚朝恩衛伯玉乃退保陝州光弼僕固懷

恩等竝走聞喜初大軍發也光弼以李抱玉留守河

陽至是抱玉以糧絕衆寡亦棄城而走朝廷憂之益

兵而鎮陝州

左倫為秦州防禦使上元二年吐蕃黨項寇邊救軍

不至倫頻敗屢連敗巴州長史思州務川縣尉

冊元 將帥部 卷之四十四 十四

鮑防爲河東節度留後太原尹兼御史大夫代宗大曆十二年正月迴紇寇太原防與迴紇戰于曲陽我師敗績死者萬餘人

馬燧爲河東節度使德宗建中三年田悅據魏博叛燧及澤潞節度李抱真諸軍同討魏城未拔幽州朱滔鎮州王武俊皆反聯兵救悅詔遣邠寧節度李懷光統朔方兵步騎一萬五千同討田悅懷光勇而無謀至魏城之日營壘未設因與滔等大戰于恆山爲滔等所敗復爲悅決水以灌之諸軍不利因與燧等退軍于魏縣

張伯儀爲荆南節度使李希烈叛逆建中四年詔伯儀與賈耽張獻甫收安州伯儀率其銳卒營於城下令裨將史神福鄧國清禦希烈將翟暉纒交鋒賊衆僞遁神福等追賊伏兵發官軍大失利伯儀中流矢者二十其所持節爲追騎所及追者奮力伯儀拔佩刀禦之兩刃相擊不下而免南投於漢得野人船而達沔州判官侍御史李穗及大將十餘人皆沒其潰兵二千餘人先奔至江陵號於庭伯儀妻魏氏遽出勞勉悉以其家財帛二千餘疋分給之皆感悅而退伯儀得散卒數百人經旬達鎮

李勉爲江南都統時李希烈圍襄城詔勉發一萬人救之又遣神策將劉德信領三千人同爲應援勉上表言襄城雖急許州正虛今若將兵直抵許州則襄城圍自解於是不待復命遂令大將唐漢臣等徑趨許州未到數十里奉詔詰責勅令旋旆二將惶懼迴軍行無斥候軍爲賊將李克誠伏兵所擊敗於扈澗殺傷大半器械輜重盡爲賊所虜漢臣走汴州德信走汝州勉懼東郡危陷又使其將李堅華領四千人守東都軍過復爲賊所隔汴州自此不振襄城亦浸危急

韓全義爲行營招討使貞元十六年正月寧州易定陳許河陽各進兵馬討吳少誠戰皆不利而退易定監軍判官劉孝勤爲賊所擒五月全義與吳少誠將吳秀吳少陽張國寧等戰于設水南廣利城官軍敗仞七月全義頓軍於五樓行營爲賊所乘大潰全義與都監軍賈英秀賈國良等夜退城守淝水縣汴宋徐泗淄青兵馬直趨陳州

嚴綬爲山南東道節度使憲宗元和十年正月詔討淮西吳元濟二月甲辰綬兵敗于磁丘初綬乘小勝不設備賊夜逼之綬乃大北退五千餘里馳入唐州

而守焉

李光顏爲忠武軍節度使元和十年八月光顏討淮  
西兵敗於時曲

高霞寓爲唐鄧節度使元和十一年六月討淮西兵  
敗於鉄城走新興柵自諸軍征討勝負皆不以實奏  
多增其殺獲及是霞寓大敗不可掩始上聞中外恟  
駭已西賊圍霞寓於新興柵監軍使李義誠突圍入  
唐州取兵以救霞寓會賊亦解去霞寓退保于唐州  
先是淮西用師於山東道特割三州之地全付霞寓  
用益聲勢霞寓雖衆裨勇敢素昧機畧至於統制尤

非所長及達所部乃率兵趣蕭坡與賊決戰旣小勝  
又進至文武柵賊軍佯敗而走霞寓逐之不已因爲  
伏兵所掩王師大歟戮十七八霞寓僅以身免坐是  
貶歸州刺史

渾鎬爲義武軍節度使憲宗命諸道出師討王承宗  
鎮定相去九十里元和十一年冬鎬率全師壓賊境  
而軍離賊壘三十里鎬計慮不周但耀兵鋒無所控  
制賊乃分兵潛入定州界焚燒驅掠鎬怒進攻賊壘  
交鋒而敗師徒殆喪其半餘衆還定州亂不可遏朝  
廷乃除陳楚代之鎬再貶循州刺史卒

李道古為鄂岳都團練使元和十二年討淮西道古大敗於申州鄆城行營烏重裔李光顏奏八月六日敗績於賈店初除裴度詔下光顏及重裔謀於都監梁守謙曰若待度至而有功即非我利也不如速戰乃大出師重裔先敗光顏救之亦退韓公武輩望旗而却敗

郝士美為澤潞節度使元和十二年諸道節度進討王承宗士美敗於栢鄉拔營而歸兵士死者千餘人杜叔良為滄景節度使穆宗長慶元年十二月滄州行營中官謝良通奏叔良領諸道兵於博野縣與鎮

州賊交戰陷沒七千餘人叔良脫身投本營二年正月貶叔良為歸州刺史叔良始以結交貴幸用將家子累至靈武節度使以無功罷未幾又以計取滄德及計幽鎮二叛遇賊輒搄其無勇先犯之既陷弓高縣尋復奔敗喪所持節故及於敗  
杜元穎為西川節度使文宗太和三年十二月元穎奏云十一月二十八日差兵馬五千人於邛州南與蠻賊交戰官軍失利其邛州為蠻所陷  
李聽以太和四年授魏州節度使時魏博史憲誠將入觀謁其府庫魏人怨之遂殺憲誠三軍共立其大

將何進陷魏人既已爲亂遂不納聽聽留館陶慢罵  
魏人遂來接戰聽軍敗績不復部伍晝夜奔走纔得  
免死軍士死傷過半輜重盡沒於賊公議當罪聽聽  
素交權倖遂除太子少師

李係僖宗時爲交州節度使時司徒平章事荆南節  
度使充諸道行營兵馬都統王鐸以係西平王晟之  
孫家世將才用爲都統都押衙兼湖南團練使時黃  
巢在嶺南鐸悉以精甲付係令分兵扼嶺路廣明初  
賊自嶺南寇湖南諸郡係守城自固不敢出戰賊編  
木爲棧沿湘而下急攻潭州陷之係甲兵五萬皆爲

賊所殺投尸於江鐸聞係敗令部將董漢宏守江陵  
自率萬兵會襄陽之師江陵竟陷於賊鐸罷相守太  
子太師以淮南高駢代鐸爲都統賊焚剽淮南高駢  
坐貶

張濬昭宗初爲戶部侍中平章事請討太原乃以濬  
爲河東行營都招討宣慰使濬軍至陰地邠岐華三  
鎮之師營平陽爲太原將李存孝擊之一戰而敗委  
兵仗潰散存孝進攻晉州數日中夜濬歛衆遁走北  
曙喪師殆半存孝進收晉絳慈隰等州濬狼狽蹂含  
山踰王屋出河清折屋木縛筏濟河部下離散將盡



鄉王師敗績太祖怒甚拘之私第然以兩浙元勳所薦且欲收其後效止落平章事罷兵柄而已數月復其官爵先是十二月僖殷奏十四日夜太陰虧帝曰我方用兵而月蝕邢不順矣深入尤不利甚憂之止景仁駐軍邢州非詔命無得擅進至其期夜漏三唱陰雲盡徹天象不變命詰殷對曰四點蝕必旣果如言帝又命奔騎詔景仁勿先動仍授以破敵形勢及辰在丙戌太陽虧而丁亥日旁有侵向背若環珥或曰積暉也敬翔曰兵可憂帝盱食矣及軍書至果以二日大敗于栢鄉過詔命所止二日餘及戰又違節

度賊師得我軍所棄制書讀之大駭曰若依此用兵吾曹安得噍類耶幸其違而衄耳帝追惋久之副招討使韓勅諸軍都虞候許從實左右神捷懷順神威夾馬等十指揮自尹皓而下諸將三十人免冠素服待罪於閣外帝責以違詔失律旣而竝令釋放劉鄩末帝時遙領鎮南節度使貞明二年三月鄩率師與晉王大戰於故元城鄩軍敗績先是鄩駐軍於莘帝以河朔危困師老於外餉餽不充遣使賜鄩詔微以真讓鄩奏以寇勢方盛未可輕動帝又問鄩決勝之策鄩奏曰人給糧十斛盡則破敵帝不悅復遣



促戰鄴召諸將會議諸將皆欲戰鄴默然一日鄴引軍攻鎮定之營彼衆大駭上下潰亂俘斬甚衆時帝遣偏將楊延直領軍萬餘人屯澶州以應鄴既而晉王詐言歸太原鄴以爲信是月召楊延直會於魏城下鄴自率軍亦至與延直會既而晉王自貝州至鄴引軍漸退至故元城西與晉人決戰大爲其所敗追襲至河上軍士赴水死者甚衆鄴自黎陽濟河奔滑州

王彥章爲北面招討使及晉王至楊劉彥章軍不利遂罷彥章兵權朝廷聞晉人將自兗州路出師未帝急追彥章領保鑾騎士數千人於東路守捉且以鄆州爲敵人所據因圖進取令張漢傑爲監軍一日彥章渡汶以畧鄆境至迺坊鎮爲晉人所襲彥章退保中都十月四日晉王以大軍至彥章以衆拒戰兵敗爲晉將夏魯奇所擒魯奇掌事太祖與彥章素善及彥章敗識其語音曰此王鐵槍因揮鞘刺之彥章重傷馬踏遂就擒晉王見彥章謂之曰爾嘗以孺子待我今日服未又問我素聞爾善將何不保守兗州此邑素無城壘何以自固彥章對曰大事已去非臣智力所及晉王惻然親賜藥以封其創

賀環爲宣義軍節度使北面行營招討使貞明四年十二月環與晉人大戰於胡柳陂環軍亦敗五年春正月晉人城德勝夾河爲柵四月環率大軍攻其南柵晉人斷我緣饘濟軍以援南柵環退軍於行臺尋以疾卒

後唐李存信爲簡較司空領彬州刺史時兗鄆之師于武皇武皇遣存信營於莘縣與朱暄合勢以抗汴人梁祖患之遣使課羅弘信曰河東志在吞食河朔廻軍之日貴道堪憂而存信戢兵無法稍侵魏之芻牧弘信怒翻然結於梁祖乃出兵二萬以攻存信存

信歛衆而退爲魏人所薄委棄輜重退保洛州軍士喪失者十二三武皇怒大出師攻魏博屠陷諸邑存信軍於洹水汴將葛從周氏叔琮來援魏人存信與鐵林都將落落遇汴入於洹水南汴人爲陷馬坑以待之存信戰敗落落被擒存信又從討劉仁恭師次安塞爲燕軍所敗武皇怒謂存信曰昨日吾醉不悟賊至公不辨耶古人三敗公殆二矣存信懼泥首謝罪幾至不測自後存信多稱病武皇以兵柄授李嗣昭以存信爲右較而已

李嗣昭爲蕃漢馬步行營都將武皇遣嗣昭與周德

威領大軍自慈隰進攻晉絳營於蒲縣汴將朱友寧氏叔琮將兵十萬營於蒲縣之南汴帥自領軍至晉州德威之軍大恐有虹貫德威之營氏叔琮率軍來戰德威逆擊爲汴人所敗兵仗輜重委棄殆盡朱友寧長驅至汾州慈隰二州復爲汴人所據

朱守殷莊宗時爲蕃漢馬步都虞候時河上對壘帝潛師之下鄆州也守殷方守德勝寨爲王彥章攻之全失禦備賊衆斷其浮橋遂失南寨莊宗聞之曰鴛才大悞予事因徹北寨往固楊劉與彥章軍沿流並進相遇卽戰北至重傷者十有八九定霸之基幾墜

於此明宗聞於鄆州密請以覆軍之罪罪之莊宗私於腹心恐而不問

周德威爲盧龍軍節度使時新州偏將盧文進殺其帥李存矩叛投契丹胡騎攻我新州甚急刺史安金全不能守棄城而遁阿保機令文進部將劉殷壽爲刺史固守其城帝怒遣周德威及河東鎮定之師三萬攻之營於城東俄而文進引契丹大至德威拔營而歸因爲契丹所躡師旅多喪

樂彥稠爲副招討使時閔帝嗣位與王思同攻鳳翔禁軍之潰彥稠欲沿流而遁爲軍士所擒而獻之

任漢權爲西京弓弩指揮使末帝清泰二年漢權言  
六月二十一日與川賊戰兵少不敵都監崔處訥傷  
甚臣部署神武堅銳兵士除夷傷外竝至鳳翔又言  
盤屋都頭許溫勇勝都頭王思儒強溫李文通下六  
百三十七人竝自漢陰敗歸

張敬達爲較尉太保應州刺史清泰三年九月敬達  
奏此月十五日與契丹戰于太原城下王師敗績時  
契丹主自率部族來援太原高行周苻彥卿率左右  
廂騎軍出鬪蕃軍引退巳時後蕃軍復成列張敬達  
楊光袁安審琦等陣於賊西北倚山橫陣諸將奮擊

蕃軍屢却至晡我騎軍將移陣蕃軍如山而進王師  
大敗投兵仗相籍而死者山積是夕收拾餘衆保於  
晉祠南晉安寨蕃軍壅而圍之自是音問阻絕朝廷  
大怒

晉沈斌少帝開運中爲祁州刺史契丹寇自鎮州  
廻以羸兵驅牛羊過其城下斌乃出精兵以擊之契  
丹以精騎剗其門邀之州兵陷賊

周穆令均爲潞州護軍世宗顯德元年三月河東賊  
將張暉率前鋒入寇營於梁侯驛潞州李筠遣令均  
率步騎各千人以拒之乙亥潞州上言令均所部兵

為劉崇所襲官軍不利時令均管於太平驛驛東南拒潞州八十里令均拒寇失於偵邏是日賊將張暉率眾凌晨而至王師遽然被甲介馬及彼退我軍追之戰伏兵發官軍且鬪且却步卒降賊者數百人餘眾姻於潞州我之騎軍不傷者僅百餘人賊眾乘勝遂薄於潞州之下

李繼勳為侍衛步軍都指揮使顯德三年六月壽州賊軍犯我南洞子王師死者數百人先是帝命繼勳領兵於壽州之南構洞屋以攻其城至是繼勳以怠於守禦為其所敗我之洞屋悉為賊所焚

冊府元龜

冊府元龜

淮南李嗣京叅闕

西極文翔鳳訂正

豫章黃國琦較釋

將帥部

陷沒

禮曰謀人之軍師敗則死之謀人之邦邑危則亡之是知荷鑿門之權當分符之寄必在謀而後動奪人之心若乃昧三陣之要乏九拒之略或提孤軍以深入或違連率之節度或兵少糧竭為敵所乘或蒲酒

自樂不恤軍政及夫城陷為俘兵窮就縛縱使辭氣抑揚不背其本鄰敵禮遇縻之好爵而令境既羅其塗炭全軍不救於覆沒將何補哉復胡顏爾

秦王離翦之孫也秦使離擊趙圍趙王及張耳鉅鹿城或曰王離秦之名將也今將彊秦之兵攻新造之趙舉之必矣客曰不然夫為將三世必敗者何也以其所殺伐多矣其後受其不祥今王離已三世將矣居無何項羽救趙擊秦軍果虜王離

漢輝渠侯僕明孝武征和三年以五原屬國都尉與貳師將軍俱擊匈奴沒

李崇為西域都護王莽天鳳中與五威將軍王駿同出西域駿為馬耆襲擊死崇收餘士還保龜茲數年莽死崇遂沒

後漢劉尚為武威將軍光武建武二十四年擊武陵五溪蠻夷深入軍沒

張鴻為謁者中元中滇吾寇隴西光武遣鴻領諸郡兵擊之戰於允吾唐谷軍敗鴻及隴西長史田颯皆沒

司馬鈞為左馮翊安帝元初二年行征西將軍督右扶風仲光安定太守杜恢北地太守盛包京兆虎牙

都尉耿溥右扶風都尉皇甫旗等合八千餘人又龐  
參將羗胡兵七千餘人與約分道竝北擊零昌參兵  
至勇士東爲杜季貢所敗於是進攻拔丁爰奚城大  
克獲杜季貢率衆僞逃約令光恢包等收羗禾稼光  
等違約節度散兵深入羗乃設伏要擊之約在城宋  
怒而不救光竝沒死者三千餘人

蔡諷爲遼東太守殤安間高句麗王宮寇遼東諷輕  
將吏士追討之軍敗沒

魏恒纂爲散騎侍郎齊王嘉平中以樂安太守與吳  
戰於東關軍敗沒

晉王育爲并州督護成都王穎在鄴又以育爲振武  
將軍劉元海之爲北單于育說穎曰元海今去育請  
爲殿下捉之不然懼不至也穎然之以育爲破虜將  
軍元海遂拘之其後以爲太傅

王衍爲太傅尚書令東海王越之討苟晞也衍以太  
尉爲太傅軍司及越薨衆共推衍爲元帥俄而舉軍  
爲石勒所破勒呼爲王公與之相見後使人夜排墻  
填殺之

霍弋爲南中監軍時交趾太守馬融卒弋遣捷爲楊  
稷代融與將軍毛昭九真太守董牙門孟翰等自蜀

出交阯破吳軍于古城斬大都督脩則交州刺史劉  
俊吳遣虞詡爲監軍薛珣爲威南將軍大都督陶璜  
爲蒼梧太守距稷等稷等城中食盡死亡者半將軍  
王約反降吳吳人得入城獲稷毛皆囚之孫皓使送  
稷下都至合浦歐血死追贈交州刺史

毛璩之爲高密內使苻堅將向南彭超陷盱眙璩之  
爲賊所執

毛德祖督司雍并三州諸軍事冠軍將軍司州刺史  
成武牢爲魏所滅

宋序爲梁州刺史鎮襄陽苻丕率衆圍序序累戰破

賊人情勞懈又以賊退稍遠疑未能來守備不謹督

護李伯護密與賊相應襄陽遂沒序陷於苻堅堅殺

伯護狗之以其不忠也

後秦姚詳爲姚興安勇將軍鎮杏城爲赫連勃勃所

逼糧盡委守南奔大蘇赫連勃勃要之衆散爲勃勃

所執

宋傅弘之爲桂陽公義真雍州治中從事赫連環襲

長安義真東歸佛佛傾國追躡於青泥大戰弘之躬

貫甲胄氣冠三軍軍敗陷沒

毛脩之爲冠軍將軍安西司馬值桂陽公義真已發



長安爲佛佛虜所邀軍敗修之與義真相失走將免矣始登一阪阪甚高峻右衛軍人叛走矣已上阪嘗爲修之所罰者以戟擲之傷額因墜阪遂爲佛佛所擒佛佛死其子赫連昌爲後魏大武所獲修之并没朱循之遷司徒從事中郎將隨到彥之北伐彥之自河南回留循之戍滑臺爲魏軍所圍數月糧盡將士薰鼠食之遂陷於魏魏大武嘉其守節以爲待中妻以宗室女

蒯思爲輔國將軍八關迎桂陽公義真義真還至青泥爲佛佛虜所追思斷後力戰連日義真前軍奔散思車人亦盡爲虜所執死於虜中

朱齡石爲高祖相國右司馬安西將軍桂陽公義真被徵以齡石持節督關中諸軍事右將軍雍州刺史勅齡石若關右必不可守可與義真俱歸齡石亦舉城奔走龍驤將軍王敬先戍曹公壘齡石自潼關率餘衆就敬先魏斷其水道衆渴不能戰城陷魏執齡石及敬先還長安見殺

中丞軍文輔神四

沈文秀爲青州刺史明帝太始三年八月魏蜀郡公拔式等馬步數萬人入西郭直至城下文秀使輔國將軍垣謀擊破之九月又逼城東十月進攻南國文

秀使員外散騎侍郎黃彌之等邀擊斬獲數千四年魏青州刺史王隆顯於安丘縣又爲軍主高崇仁所破死者數百人魏圍青州積久太宗所遣救兵竝不敢進乃以文秀弟征北中參軍文靜爲輔國將軍統高密北海平昌長廣東萊五郡軍事從海道救青州文靜至東萊之不期城爲敵所斷遏不得進因保城自守爲虜所攻屢戰輒尅太宗加東青州刺史四年不期城爲虜所陷文靜見殺文秀被圍三載外無援軍士卒爲之用命無離叛者日夜戰鬪甲冑生蟻五年正月二十四日遂爲魏兵所陷城敗之日解釋戎

衣緩服靜坐命左右曰取所持節魏兵旣入兵交至問曰青州刺史沈文秀何在文秀厲聲曰身是因執之牽出聽事前剥取衣服時以慕容白曜在城西南角樓裸縛文秀至曜前執之者令拜文秀曰各二國大臣無相拜之禮卽命還其衣爲設酒食饌送桑乾崔道爲冀州刺史泰始三年爲魏所陷被送桑乾死於虜中

南齊楊公則領白馬戍主時氐賊李烏奴作亂攻白馬公則固守經時矢盡糧竭陷于寇賊

梁胡僧祐仕魏至銀青光祿大夫以大通三年歸國

頻上封事高祖器之拜假節超武將軍文德王帥使  
戍傾城後城陷復沒于魏

鮑泉爲信州刺史率平南將軍王僧辯等率舟師東  
逼邵陵王於郢州郢州平元帝以長子方諸爲刺史  
泉爲長史郢州行府州事侯景密遣其將朱子仙任  
約率精騎襲之方諸與泉不恤軍政唯蒲酒日樂賊  
騎至百姓奔告方諸與泉方雙陸不信曰徐文盛大  
軍在東賊何繇得至而傳告者衆姑令闔門賊縱火  
焚之莫有抗者賊騎遂入城乃陷賊執方諸及泉送  
之景所後景攻王僧辯於巴陵不尅敗還乃殺泉於

江夏沉其屍于黃汴磯

王顓爲梁世祖督城內諸軍事荆口城陷顓隨王琳  
入齊爲景陵郡守齊遣琳鎮壽春顓弟頌少有志節  
嘗隨從世祖及邢城陷復沒於西魏

陳裴忌爲譙州刺史未及之官會吳明徹受詔進討  
彭汴以忌爲都督與明徹犄角俱進吕梁軍敗陷于  
周周授上開府

程文季爲明威將軍隨吳明徹北討於昌梁敗績爲  
周所囚仍授開府儀同三司自州逃歸至隅陽爲邊  
吏所執送長安死於獄中

後魏元孚爲冀州刺史孝明孝昌三年十一月葛榮攻陷冀州執孚逐出居民凍死者十六七

元緒莊帝初爲直閣將軍持節兼武衛將軍關右慰勞十二州大使遂沒吐谷渾

畢祖暉建義中行幽州事加撫軍將軍永安中祖暉從大領柵規入州城于時賊帥叱于麒麟保太子畢祖暉擊破之而賊宿勤明達覆攻祖暉兵少糧竭軍援不至爲賊所乘遂歿

陸希賢爲建州刺史爾朱榮之死也世隆率衆北還晉陽希賢固守拒之城陷兄子被害希賢妻元氏榮

妻之兄孫繇是獲免

源子恭爲散騎嘗侍遷侍中爾朱榮之死也世隆度律斷據河橋詔子恭爲都督以討之出頓于大夏門北尋而太府卿李苗夜燒河橋世隆退走仍以子恭兼尚書僕射爲大行臺大都督尋遷衛將軍假車騎將軍率諸將於太原築壘以防之旣而爾朱兆率衆南出子恭所部都督史仵龍羊文義開柵降兆子恭退走爲兆所破衆旣退散兆因入雒子恭竄於侯氏仍被執送

薛懷雋爲征南將軍益州刺史東魏孝靜天平初雋

還至梁州與刺史元羅俱為梁將蘭欽所擒送江南  
梁武見懷雋謂之曰卿父先為魏州刺史我于時猶  
在襄陽且州壤連接極相知練卿今至此當能任乎  
若欲還者亦以禮相遣顧謂左右曰此子任此富貴  
極不可言懷雋便乞歸梁武聽還國

崑景為幽安光充四州行臺杜維周還據上谷授景  
平北將軍行臺如故後維周南圍范陽城人翻降執  
刺史王延年及景送於維周尋為葛榮所吞景又入  
榮榮破景得還朝

北齊薛震東魏孝靜天平初鎮守龍門陷於西魏元

象中方得逃歸神武嘉其至誠除廣州刺史

張遵業為安西將軍建州刺史東魏武定中隨儀同

劉豐討侯景為景所擒景敗殺遵業於渦

慕容子顥為鎮西將軍文宣天寶初封漢中郡公後

因戰沒於關中

王敬寶為東魏廣州刺史與蕭軌等攻建業不尅沒  
焉

宋顯為西兗州刺史勇決有氣幹及河陰之戰深入  
赴敵遂沒于行陣

鮮于世榮為領軍將軍周師將入鄴除領軍大將軍

丹元 隋 卷之四百四十四  
太子太傅於城西拒戰敗被擒

後周蕭世怡仕梁爲仁威將軍譙州刺史及侯景作亂路繇城下襲而陷之世怡遂被執尋遁得免

陸騰初爲東魏陽城郡守大軍東討以騰所據衝要遂先攻之時兵威甚盛長史麻休勸騰降不許拒守經月餘城陷被執太祖釋而禮之間其東間消息騰盛陳彼州人物又敘述時事辭理抑揚太祖笑曰卿真不肯本也即拜帳內大都督

趙善爲左僕射兼侍中西魏文帝太統九年從戰邙山大軍不利善爲敵所獲遂卒於東魏建德初朝廷

與齊通好齊人乃歸其柩

田弘敢勇有謀畧魏永安中陷於万俟醜奴爾朱天光入關弘自原州歸順授都督

許孝敬吳人勁勇過人爲時驍將以大將軍守河東旣無救援爲吳明徹所擒遂戮於建康市

元定武帝時爲大將軍天和二年陳湘州刺史華皎舉州歸梁主欲因其隙更圖攻取乃遣使請兵詔定從衛公直率衆赴之梁人與華皎皆爲水軍定爲陸軍直總管督之俱至夏口而陳郢州堅守不下直令定率步騎數千圍之陳遣其將淳于量徐度吳明徹

丹府元載 卷之四十四  
等水陸來拒量等以定已渡江兵勢分遂與水軍交  
戰而華皎所統之兵更懷疑貳遂爲陳人所敗皎得  
脫身歸梁定旣孤軍懸隔進退無路陳人乘勝逼之  
定乃率所部砍竹開路且行且戰欲趨湘州而湘州  
已陷徐度等知定窮迫遣使僞與定通和重爲盟誓  
許放還國定疑其詭詐欲力戰死之而定長史長孫  
隆及諸將等多勸定和乃許之於是爲度等所執部  
下衆軍亦被囚虜送詣丹陽居數月憂憤發病卒  
裴寬天和三年爲温州刺史初陳氏與周通和每修  
聘好自華皎附後乃圖寇掠沔州旣接敵境事資守

扞於是復以寬爲沔州刺史而州城卑狹器械又寡  
寬知其難守深以爲憂又恐秋水暴長陳人得乘其  
便卽白襄州總管請益戍兵并請移城於羊蹄山權  
以避水總管增兵守禦不許移城寬乃量度嘗年水  
至之處豎大木於岸以備船行襄州所遣兵未至陳  
將程靈洗已率衆至於城下遂分布戰艦四面之水  
勢猶小靈洗未得近城寬每簡募驍兵令夜掩擊頻  
挫其銳相持旬日靈洗無如之何俄而雨水暴長所  
豎木上皆通船過靈洗乃以大艦臨逼柏王村樓應  
卽摧碎弓弩矢石晝夜攻之苦戰二十餘日死傷過

半安垣毀盡陳人遂得上城短兵相拒猶經二日外無繼援力屈城陷之後水便退縮陳人乃執寬至揚州尋被送嶺外經數載復還建業遂卒於江左

隋龐晃爲驃騎將軍衛王直出鎮襄州晃以本官從尋與長湖公元定擊江南孤軍深入遂沒於陳數年衛王直遣晃弟車騎將軍元雋賫馬八百疋贖焉乃得歸朝拜上儀同賜綵二百段復事衛王

史祥爲燕郡太守被賊高開道圍之城陷開道甚禮之會開道與羅藝通和送祥於涿郡卒於塗

楊武通爲左衛大將軍討嘉州叛獠束馬懸車出賊不意頗戰破之賊知其孤軍無援傾部落而至武通轉鬪數百里爲賊所拒四面路絕武通輕騎挑戰墜馬爲賊所執殺而噉之

唐慕容羅睺爲將軍高祖武德元年七月劉文靜及薛舉大戰于涇州文靜敗績羅睺與李安遠劉弘基沒於舉

李仲文武德初爲太常少卿劉武周令宋金剛率衆侵并州軍黃蛇鎮又引突厥之衆兵鋒甚盛襲破鄠次縣進陷介州高祖遣仲文率衆討之爲賊所執一

軍全沒



劉弘基爲右驍衛大將軍從太宗討薛舉時太宗以疾頓於高掖城弘基劉文靜等與舉接戰於淺水原王師不利八總管咸敗唯弘基一軍盡力苦戰矢盡爲舉所獲

永安王孝基高祖從父兄初劉武周攻陷晉州進取滄州屬縣悉下夏縣人李崇攻殺縣令自號魏王以應賊河東賊師王行本又密與金剛連和關中大駭高祖令太宗益兵進討屯於栢壁相持者久之又命孝基及陝州總管于筠工部尚書獨孤懷恩內史侍郎唐儉進取夏縣不能克軍于城南崇茂與賊將射

遲敬德襲破孝基營諸軍並陷四將俱沒

盛彥師爲宋州總管會徐圓朗反彥師爲安撫大使因戰遂沒於賊

許善護爲貝州刺史武德五年遇賊帥劉什善於鄆縣善護死于陣全軍並沒

淮安王神通擊宇文化及及走聊城神通進至聊城乃分兵數千人往魏州取攻具中路復爲莘人所敗竇建德且至遂引軍而退後二日化及爲建德所虜賊勢益張山東城邑多歸建德神通兵漸散退保黎陽依徐勣俄爲建德所陷神通沒于賊

曹仁師爲左鷹揚衛將軍則天萬歲通天元年契丹  
攻陷營州令仁師與右金吾衛將軍張玄遇等討之  
戰于四硤石谷官軍敗績玄遇仁師並爲賊所虜  
孫佺爲幽州都督睿宗延和元年六月將兵二萬騎  
八千以襲衆師至冷陁并沒焉佺爲虜所擒送于默  
啜副使將軍周以悌死之將軍李楷維烏可利張真  
楷挺身以出初佺之將行也烏可利諫曰暑熱道險  
懸師遠襲舉非其時往而必敗佺曰薛訥在邊積有  
年矣然竟不能復營州使東北無事今與公同心戮  
力掩其不備可以有功道險暑熱安能避乎於是遂

行命李楷維將騎兵四千爲前軍遇賊八千騎與戰  
楷維敗佺素怯懦見賊至驚懼率衆欲還又爲虜所  
敗乃投惡山爲營列方陣而待之虜謂佺曰旣以和  
親何得輕來襲我佺曰吾來和親爾虜曰若和親國  
信物安在佺乃悉軍資以與之虜得而更戰軍遂大  
敗至夜衆餘七千佺謂衆曰卽兵南還於是兵皆散  
走佺爲虜所得

李宓爲侍御史劔南留後玄宗天寶十三載率兵擊  
雲南蠻於西洱河糧盡軍旋馬足陷橋爲閣羅鳳所  
擒舉軍皆沒

程千里爲上黨節度肅宗至德二年九月與賊挑戰爲賊將蔡希德所擒

王仲升爲淮西節度元年建辰月與賊將謝欽讓戰于申州城下爲賊所虜淮上震駭

扶餘準爲朔方河中副元帥押衙德宗貞元三年隨渾瑊盟于平涼戎人欺盟而亂作準步鬪獲免瑊準繇是沒於蕃中令隨水草收羊馬

李驂者隴西人貞元初爲殿前射生官三年秋隨神策次將護邊師次夏州北驂領遊兵前行爲蕃兵所掠亦以囚見贊普令與扶餘準偕收苦役辱之會烏

重玘使西域重玘朔方子弟與驂有舊嘗知其不死旣見吐蕃宰相求準驂得以生還九沒西域三十三年

楊襲古爲北庭節度貞元六月冬吐蕃率葛祿白眼之衆來寇北庭迴鶻大相頡于迦斯率衆援之頻戰敗績吐蕃攻圍頗急北庭之人旣苦迴紇是歲乃舉城降之於吐蕃沙陁部落亦降焉襲古與麾下二千餘人出奔西州頡于迦斯不利而還七年秋又悉其丁壯五六萬人將復北庭仍召襲古偕行俄爲吐蕃葛祿等所擊大敗死者大半頡于迦斯給之曰且共

我同至牙帳當送君歸本朝也襲古從之及牙帳遂留而不遣竟殺

高馮從事于宣武軍知曹州事李靈曜作亂馮密遣使奏賊中事詔除曹州刺史無何李正己盜有曹濮馮遂陷於賊

孫揆為澤潞節度使昭宗大順元年與官告使轉歸範至長子縣西為太原將李存孝所虜

龐師古權徐州兵馬留後乾德四年十一月癸酉淮南大將朱瑾潛出州師襲汴州于溝口師古舉軍皆沒師古被執時兗州留後葛從周自霍丘渡淮至濠

州聞師古敗乃退軍信宿至泚河方渡而朱瑾至是日殺傷溺死殆盡還者不滿千人唯牛存節一軍先渡獲免比至潁州大雪寒凍死者十五六自古喪師之甚無如此也

梁杜洪江夏伶人唐光啓中遂為本州部較因戰立威逐其廉使自稱留後及楊行密乘勝急攻洪鄂洪復乞師于太祖命荆南成汭率荆襄州師以赴之未至夏口汭敗溺死淮人遂陷鄂州洪為所擒被害於廣陵市繇是行密據有江淮之間

鄧季筠為太祖牙將主騎軍唐太順初唐帝命丞相

張濬伐太原太祖奉詔出師西至高平與晉人接戰  
軍既不利季筠為晉人所擒晉王見之甚喜釋縛待  
以賓禮

苻道昭為秦州節度使太祖受禪委以兵柄與康懷  
美等攻潞州以蚰蜒塹繚之飛鳥不度既踰歲晉人  
援至王師大敗道昭為晉軍所殺

徐懷玉為鄜坊節度使庶人友珪既篡立河中朱友  
謙拒命遣兵襲鄜州懷玉無備尋為河中所虜囚於  
公館及友珪遣康懷英率師圍河中友謙慮懷玉有  
變遂害之

王虔裕為義州刺史時孟遷請降未幾晉人伐邢孟  
遷使來乞師太祖先遣虔裕選勇士百餘人徑往赴  
之伺夜突入荊州明日循堞樹立旗幟晉人不測乃  
退數月復來圍邢時太祖大軍方討交鄆未及救援  
邢人因而携貳遷乃繫虔裕送于太原尋為所害  
後漢李嗣昭為內衙都將權典河中留後事唐末梁  
祖自率軍三萬至臨明葛從周設伏於青山口嗣昭  
聞梁祖至斂軍而退從周伏兵發為其所敗偏將王  
邰朗楊師悅等被擒  
李承嗣為洛州刺史唐末兗鄆為汴人所攻勢漸危

賊遣使乞師於武皇武皇遣承嗣帥三千騎假道於魏渡河援之時李存信屯于莘縣旣而羅弘信背盟掩擊王師因茲隔絕及瑄瑾失守承嗣與朱瑾史儼同入淮南石君立初隸李嗣昭爲牙較歷典諸軍唐末將兵屯德勝時汴軍自滑州轉餉以給楊村砦莊宗親帥騎軍於河外循岸而上邀擊之汴人距楊村五十里於河曲潘張村築壘以貯軍儲莊宗令諸軍攻之汴人設伏于要路逆戰僞敗王師乘之蹶入壘門梁伏兵起因與血戰君立與鎮州大將王釗等隔入賊壘時

諸將部較陷賊者十餘人君立被執送于汴梁主素知其驍勇欲用之爲將械而下獄久之梁主遣人誘之君立曰敗軍之將難與議勇如欲將我我雖真誠效命能信我乎人皆有君吾何忍反爲仇人哉旣而諸將被戮尚惜君立不之害同光元年莊宗至汴前一曰梁主始令殺之

史敬思爲太原裨將衛從武皇入汴州舍於上原驛是夕爲汴人所攻敬思方大醉因蹶然而興操弓與汴人鬪矢不虛發汴人死者數百夜分冒雨方達汴橋左右扶武皇決圍而去敬思後拒血戰而沒武皇

還營知失敬思流涕久之

周德威爲盧龍等軍節度使唐末平次故柳誥旦騎報曰汴軍至矣莊宗思問戰備德威奏曰賊倍道而來未成營壘我營柵已固守備有餘旣深入賊疆須爲萬全之策此去大梁信宿而近賊之家屬盡在其間人之掌情孰不以家國爲念以我深入之衆抗彼激憤之軍不以方略制之恐難必勝王但按軍保柵臣以騎軍疲之使彼不得下營際晚糧爨不給進退無據因以乘之破賊之道也莊宗曰吾軍河上終日挑戰恨不遇賊今欵門不戰非壯夫也乃率親軍戍

列而出德威不獲已從之謂其子曰吾不知其死所矣莊宗與汴將王彥章接戰大敗之德威之軍在東偏汴之游軍犯我輜重衆駭奔入德威軍因紛擾無行列德威兵少不能解父子俱戰歿先是鎮星犯上將星占者云不利大將是夜收軍德威不至莊宗慟哭謂諸將曰喪我良將吾之咎也

張敬達爲晉州節度使從晉高祖爲北面兵馬副總管仍屯兵鴈門未幾晉祖建義末帝詔以敬達爲北面行營都招討使仍便委引步下兵圍太原以定州節度使楊光遠副焉尋給兵三萬營于晉安鄉末帝

丹月元 計 陷 沒 卷之四百四十四  
自六月繼有詔促令攻取敬達設長城連柵雲梯飛  
礮使工者運其巧思窮土木之力時督事者每有所  
構則暴風大雨平地水深數尺而城柵摧墮竟不能  
合其圍九月契丹至敬達大敗尋爲晉祖及蕃衆所  
迫一夕圍河蕃衆自晉安寨南門外長百餘里闊五  
十里布以氊帳用毛索懸鈴令部伍多縱火以備警  
急營中嘗有夜遁者出則犬吠鈴動跬步不能行焉  
自是敬達與麾下部曲五萬人馬萬匹無繇四奔但  
見穹廬如岡阜相屬諸軍相顧失色始則削木篩糞  
以飼其馬日望朝廷救軍及馬漸羸死則與將士分

食之馬盡食殫副將楊光遠次將安審琦知其不濟  
勸敬達宜早降以求自安敬達曰吾受恩於明宗位  
歷方鎮主上授我大柄而失律如此已有愧於心也  
今救軍在近旦暮雪耻有期諸公何相迫耶待勢窮  
則請携吾首以降亦未爲晚光遠與審琦知敬達意  
未決恐坐成魚肉遂斬敬達以降未帝聞其歿也愴  
慟久之時戎王戒其部曲及漢之降者曰爲臣當如  
此人令部人收葬之

晉程璋爲新州刺史高祖建義割新州屬北虜時契  
丹大軍歸國遣璋於管内配率犒宴之資須及十萬



緡山役地貧民不堪命始戎王以軟語撫璋璋謂必得南歸及委璋平叛奚圍雲州皆有功故留之不遣璋鬱鬱不得去遇疾尋卒焉

蔡行遇爲左武衛將軍少帝開運初博州刺史周儒以城降虜又與楊光遠人使往返引契丹於馬家渡濟河時郭謹在汶陽遣行遇率數百騎赴之遇伏兵於葭葦中突然而出轉鬪數合部下皆遁行遇爲賊所劈鋒鏑重傷不能乘馬坐畚中昇至虜帳

周史彥超爲華州節度使世宗親征太原大軍至河東城下契丹營於忻代之間遙應賊勢詔天雄軍節度使苻彥卿率諸將屯忻州以拒之彥卿襲契丹於忻口彥超以先鋒軍追蕃寇離大軍稍遠賊兵伏發爲賊所陷世宗痛惜久之詔贈太師

